


1030

LES
DERNIERES ACTIONS
ET PAROLES DE
MONSIEVR LE PRESIDENT
DE
BARILLON,
DECEDE' A PIGNEROL
LE TRENTIESME AOUST
mil six cens quarante-cinq.

*PAR LE R. P. ANTOINE RIVIERE,
Docteur de Paris, Prieur & Vicaire General
au Couuent de S. Augustin, à Pignerol.*

DEDIE'ES A MONSIEVR L'ESNE,
Conseiller du Roy, & Auditeur en sa Chambre
des Comptes à Paris.



A PARIS,
Chez SEBASTIEN MARTIN, rue S. Iean de Latran,
prés le College Royal.

M. DC. XLIX.
AVEC PERMISSION.

THE ACT OF

THE

THE

THE

THE

THE

THE

THE

THE

THE

THE

THE

THE

THE

THE

A PARIS

chez Sebastien Martin, rue St. Jean de la Harpe,

près le Collège Royal.

M. DC. XLIX.

AVEC PERMISSION



LES DERNIERES ACTIONS

Et paroles de Monsieur le President de Barillon decedé à Pignerol le trentiesme Aoust mil cens quarante-cinq.



MONSIEUR,

Je r'ouure vne playe pour vous obeïr, que le temps auoit à demy fermée, & vostre commandement me fait repasser dans l'esprit le mesme saisissement qui me pensa faire mourir il y a quelques mois; iugez de la contrainte où vous me jetez, & avec quel zele j'embrasse ce qui vous est agreable: que si ie nereüssi pas dans la suite de ce discours, & si la politesse de vostre esprit trouue informe ce que ie produits, c'est que comme l'excessiue douleur interdit les fonctions de nostre ame, la perte que i'ay à vous desduire ne m'oste pas seulement la raison, mais aussi la parole. En effet, mes soupirs preuenans mes pensées, m'empeschent de les exprimer; & si la passion que i'ay de vous satisfaire n'animoit mon insensibilité, la detresse qui saisit mon cœur au point que ie m'efforce de vous complaire, ne me permettroit iamais de

A ij

vous faire vn exact recit des derniers actions de la vie de Monsieur le President de Barillon ; ie sçay que comme il estoit vostre intime amy , la perte vous en est fort sensible , & que vous perdirés plus de la moitié de vous-mesme en la mort de ce grand Homme.

Certes, Monsieur, ie puis dire sans flatterie , que quoy que vous puisse suggerer à son auantage l'affection que vous luy portez, ce sera tousiours au dessous de ce qu'il meritoit , & il seroit à souhaitter qu'il eust esté de luy comme de la lampe du Sanctuaire, ou du feu des Vestales, qui ne s'esteignoit iamais. Peu de personnes peuuent rendre comme moy vn veritable témoignage de sa vie ; car bien que ie n'aye eu l'honneur d'estre cognu de luy que trop tard pour mon instruction, ie me puis vanter de l'auoir cognu en vn temps où l'homme sans desguisement estalle iusques à ses moindres pensées ; joint qu'ayant pris vne estime de moy, bien au dela de ce que ie vaux, il y auoit quelque creance, & que pour cét effet il me choisit entre beaucoup d'autres, pour l'assister durant toute sa maladie : Ie luy donné la derniere absolution, ie le consolé parmy ses dernieres agonies, & ie ne croy point que, horsmis moy, pas vn de tous ceux qui l'assistèrent iusques à la mort, vous puisse faire le détail que vous me demandez, du dernier moment de sa vie. Il est remarquable par tant de rares circonstances, que ie ne m'en puis souuenir sans me plaindre de nostre commune perte, & me resiouir de son bonheur & de sa gloire.

Pleust à Dieu que ie pûsse faire entendre de viue
voix

voix à Madame la Presidente , ce que ie vous escris dans cette lettre ! mais ie sçay que vous luy estes trop amy pour luy dénier cette satisfaction, & ie me persuade que ce mot sera tout puissant pour adoucir l'amertume d'une si sensible perte que la sienne ; toutesfois ne precipitez rien , mais donnez luy le temps de pleurer cette separation , qui ne s'est pû faire sans de rudes secousses. Les remedes donnez à contre-temps sont presque tous mortels , & on touche rarement aux malades durant les crises ; comme ie ne doute pas de la fermeté de son ame , ny de son entiere resignation , vostre patience sera de peu de iours , & son esprit qui se conforme aux volontez de Dieu , s'abandonnera bien-tost à sa prouidence : elle sçait qu'il est le protecteur des vefues & des orphelins , & qu'il endurecit par les trauerses , ceux qu'il veut couronner dans la gloire , outre que i'espere qu'elle trouuera en ce petit discours vne sensible consolation pour son malheur , & vn preseruatif assure contre ses maux. Certes , Monsieur , les voyes de Dieu sont fort incognuës aux hommes , il se sert de secrets , que nous ne pouuons pas comprendre ; car souuent il fait nostre bon-heur , de ce qui sembloit n'estre fait que pour nostre ruyne. Qui n'eust iugé dans l'éloignement de ce grand Homme , que perdant Paris il perdoit tous ses aduantages ; mais Dieu a fait voir en sa Personne , que souuent il nous tire du grand monde pour nous approcher de luy ; & que s'il nous iette dans la solitude , c'est pour nous conuerfer plus familièrement. Monsieur de Barillon passoit dans Paris pour vn homme de haute reputa-

tion, sa Charge luy donnoit de l'esclat & du credit, mais sa retraite luy a procuré quelque chose de plus glorieux: l'adresse d'un Pilote ne se cognoit que durant l'orage, il est facile de voguer quand les Zephirs enflent les voiles, mais quand la tourmente se saisit d'un vaisseau, que l'air & les eaux se confondent pêle-mêle, & que du Ciel nous tombons aux plus profonds abyssmes, la science ny la dexterité ne seruent de gueres en cette rencontre, & nous auons moins besoin d'art que de constance: Aussi fut-ce en cette occasion que ce Homme signala son courage, il fit voir que sa vertu estoit plus au dedans qu'au dehors, & que ce que nous admirions durant son bon-heur, n'estoit qu'un foible rejaillissement des rares qualitez de son ame.

Si j'estois l'unique qui fusse tesmoin de ce qu'il a fait depuis sa sortie de Paris, quelque'un peut-estre me pourroit soubçonner; mais outre que ma robe m'oblige de rendre à la verité ce qu'elle merite, mille personnes qui l'ont vû durant son voyage, deposeront pour ce que j'advance. Il sembloit qu'à mesure qu'il éloignoit cette capitale du Royaume, où il n'auoit que des Adorateurs, que son esprit se purifioit, un certain brillant paroissoit sur son front, qui tesmoignoit la tranquillité de son ame; & à le voir si fort esgal en ce mal-heur, plusieurs s'imaginerent qu'il n'alloit qu'en vne pourmenade, & non pas en vne prison: cette ferme assiette luy venoit de la parfaite cognoissance qu'il auoit de nostre condition; que tout, icy bas, est sujet aux coups de la fortune; que l'homme ne s'y peut pro-

mettre de paix; qu'il ne peut pas mesme s'y asseurer de la moindre trêve; que tout ce que les hommes appellent felicité, ressemble à ces petites empoules qui se font d'eau & de saumon; elles brillent de mille couleurs, mais elles ne durent qu'un moment: & qu'on doit iuger de nostre vie, comme des guerres, qu'on n'estime iustes, que quand elles ont des heureuses issues. Sur cette inconstance, il se resignoit entierement aux volontez de Dieu, il remettoit ses interets entre ses mains; car il sçauoit qu'il estoit le seul iuste vengeur des outrages, qu'à luy seul en appartenoit la punition, & que s'estoit entreprendre sur la Diuinité, d'auoir le moindre ressentiment pour nos ennemis; d'où vient qu'il respondoit ordinairement à ceux qui l'approchant pour le consoler, luy disoient, qu'il deuoit esperer, que son innocence feroit bien-tost recognüe, & qu'il deuoit attendre un beau iour apres cét orage. *La volonté de Dieu soit faite (mes amis) ie me remets entierement à sa prouidence, ie m'abandonne à sa sagesse, ie luy laisse la disposition de mes biens, de mon honneur, & de ma vie, ie renonce à ma liberté, car ie sçay que tout ce que nous voyons sont des effets de sa conduite, que rien ne paroist s'il n'a son aduen, & que les maux qui nous pressent sont des coups, ou de sa iustice, ou de sa misericorde.*

Ce sont les mesmes termes dont il m'entretenoit le 18. ou 19. Iuillet, au matin, que i'eus l'honneur de le conferer particulièrement. Ceux qui l'ont accompagné depuis sa sortie de Paris, iusques à Pignerol, m'ont asseuré, que son plus sensible déplaisir estoit d'estre separé de sa chere & fidele compagne, Madame la Pre-

fidente; que la priuation de ses honneurs, ny celle de ces amis, qu'il estimoit plus que soy-mesme, ne le touchoient point en comparaison; qu'il sçauoit que les vns dépendoient de la fortune, & que l'affection des autres trouueroit assez de moyens pour se satisfaire durant son absence; qu'il ne doutoit pas que Madame de Barillon n'eust assez de cœur pour se resoudre sur sa disgrâce, qu'elle ne luy reseruast toutes ses inclinations, & que comme la Palme, elle ne se roidit contre le mal-heur pour le secourir; mais qu'il cognoissoit la qualité de son mal, qu'il estoit contagieux, & qu'il ne se communique pas seulement à celui qui l'approche, mais aussi à ceux qui en sont fort éloignez.

Ces pensées l'entretindrent de Paris iusques à Embrun, où il arriua le 15. Aupil, le Samedy Sainct.

Le lendemain se passa en deuotion, (comme le doit faire vn parfait chrestien) il se confessa, & receut la sainte & sacrée Communion de la main de Monseigneur l'Euesque d'Embrun. Incontinent apres son disner il visita ce Prelat, dont ils eurent ensemble vne assez longue conference, en suite dequoy ils furent ouïr la Predication, puis les Vespres.

Le 17. il partit d'Embrun, & le lendemain il arriua en cette Ville de Pignerol sur les quatre à cinq heures de releuée; il estoit porté dans vne litiere, d'où sortant souuent la teste, il saluoit vn chacun d'un visage guay, & si plein de douceur, qu'il arrachoit du cœur des regardans des larmes, bien qu'elles ne sortissent pas de leurs yeux.

Comme il fut deuant le logis, où pend pour enseigne

gne l'Espée Royale , on arresta sa litiere ; & à quelque temps de là il fut conduit dans la Citadelle, où tost apres on le vit se promener sur ses bastions avec Monsieur du Couty qui commande en cette Place.

Je ne puis vous particulariser plus nettement la marche qu'il fit de Paris en cette Ville : car, comme ie ne debite pas volontiers pour mien ce que j'apprends par le rapport d'autrui, vous me pardonnerez si ie me ferme à ce que i'ay remarqué en sa Personne de plus considerable, depuis que j'eus l'honneur de le conuerser. Qu'on ne m'accuse point de flatterie, si ie dis que ie l'admiray comme vn homme extraordinaire ; sa constance, sa patience, & la ferme assiette de son esprit faisoient que souuent on prenoit pour stupidité, ce qui ne venoit que de la solidité de sa vertu.

Incontinent apres qu'il fut en cette retraite, il commença de regler ses journées : le matin il assistoit à la Messe, & il l'entendoit avec tant de deuotion, que souuent les Capitaines de la garnison s'estonnoient, qu'un homme qui auoit tousiours vescu parmy le monde, & dans l'embarras des affaires, eust des destachemens si particuliers ; ils ne pouuoient comprendre comme la Politique de la terre s'accommodoit si bien en sa Personne, avec celle du Ciel, & faisoient passer pour miracle, ce qui ne venoit que de la reguliere conduite de sa vie.

Après auoir rendu les devoirs à celuy de qui il aduoüoit dependre absolument, il faisoit quelques tours sur les bastions de nostre Citadelle, puis il se retiroit en son appartement, où il passoit deux heures à

la lecture de quelque bon liure : ne vous imaginez pas que le siecle eut part en ces lectures , mon Pere saint Augustin & saint Bernard estoient son entretien ; l'un, disoit-il , luy apprenoit à porter patiemment ses disgraces, & l'autre à regler ses actions.

Les Soldats de nostre garnison peuuent respondre pour moy de la verité que j'advance : comme ils ont eu le plus de part en ses bonnes actions, ils sont tenus de rendre ce tesmoignage pour sa gloire ; que dans les familiers entretiens qu'ils auoient iournellement avec luy, il les conjuroit d'honorer Dieu, comme celuy de qui ils dependoient absolument, & de seruir le Roy qui en estoit la viuante Image. Ces pauvres delabrez le suiuiuent, comme firent autrefois Hercule nos vieux Gaulois ; sa charité en habilloit plusieurs ; ses remonstrances corrigeoient les autres ; & son exemple les changea si fort, qu'ils demeurèrent d'accord avec luy, que tous les iours vn d'entr'eux chanteroit à haute voix les Litanies de la sainte Vierge, si tost qu'on sonneroit la retraite ; mais afin de les animer en cette loüable pratique, tous les iours il distribuoit à celuy qui les chantoit quelques pieces d'argent, afin d'entretenir ce loüable commerce.

La liberalité qui est l'éloquence des grands hommes prist bien-tost creance parmy cette milice ; le iurement & le blaspheme , qui est ordinaire parmy les troupes , trouua son exterminateur : car, soit par remonstrances, soit par menaces, soit mesme faisant des presens à ceux qui s'abstenoient de iurer, il bannit de la bouche de nos Soldats ces iuremens qui font trem-

bler les Anges, & qui rendent les hommes pires que les Diables: on s'estonna d'abord de voir parmy nos troupes ce changement si soudain, & nostre garnison sembloit estre composée de cette vieille Legion Chrestienne, qui estoit du temps des Empereurs Romains, qui auoit autant de Saincts que de Soldats, & qui par sa deffaite quittant la terre alla peupler le Ciel.

Mais tandis qu'il est parmy ces saintes occupations, Dieu luy voulut tesmoigner qu'il ne le perdoit point de veüe; car, comme les maladie chez les Saincts, sont ordinairement prises pour des amoureuses visites qu'il leur fait, afin de les endurcir pour les former au modelle de I E S V S crucifié, & les rendre dignes des suffrages de sa mort; vne fièvre le prist la nuit du Vendredy 21. de Iuillet, qui fut pronostiquée par vn mal de teste, dont il se plaignit tout le iour: le Samedi & le Dimanche il parut en bonne disposition; il se fit porter à l'Eglise dans vne chaire, où il ouït la Messe, & le reste du iour il le passa en ses ordinaires exercices; mais la nuit vn frisson le prit, qui fut, & plus long & plus violent, que le premier, ce qui fit soubçonner, que sa fièvre seroit peut-estre quarte; nonobstant cét accez il celloit son mal à tout le monde, & il disoit à ceux qui le visitoient, que ce mal luy estoit familier, & qu'en France il estoit fort sujet à la migraine; mais quoy qu'il pût dire, le sieur Poncet Medecin de Monsieur le Lieutenant de la Citadelle, apprehendant quelque plus violente irruption, luy conseilla de se purger, ce qu'il fit. Le soin qu'on prist de luy, le fit contraindre dans son mal; car, comme il vit qu'on se

mettoit en peine pour sa santé, & que toute la garnison prenoit part à la douleur qu'il souffroit, il fut quelque temps à la gourmander, ce qui fit qu'on creut que les remedes auoient abbatu sa fièvre, & que ce n'estoit rien. Toutesfois le mal le força à la fin de se descouvrir, & en quelque ferme assiette que fust son ame, son corps tesmoigna par quelques syptomes, que la nature souffroit violence; car, outre que sa fièvre parut reglée en quarte, il luy prenoit de petites defailances, durant lesquelles vne certaine sueur luy montoit au front: cela neantmoins ne luy osta, ny sa couleur, ny son embompoint.

Le Dimanche trentiesme du mois, il me manda par Monsieur de Ramiers, qu'il nous feroit l'honneur de visiter nostre Maison, si tost qu'il auroit oüy la Messe aux Religieuses de sainte Marie: il y arriua aussi-tost, & mesme voulut monter en ma chambre, & entrer dans vn petit cabinet, où il m'entretint plus d'une heure, de là il retourna en la Citadelle, & il ne se passoit point de iours, hors ceux de son accez, qu'il ne visitast quelques Maisons de Religieux & Religieuses, où il entendoit la Messe, & y passoit toute la matinée en conference: c'estoit le charme dont ordinairement il se seruoit, ou pour diuertir sa tristesse, ou pour satisfaire son esprit.

Comme il vit que les remedes humains ne pouuoient rien sur sa fièvre, il eut recours à de plus puissans. Le deuxiesme Aoust il fit ses deuotions au Conuent de saint François, où i'eus l'honneur de l'entretenir durant vne heure de pourmenade, qu'il fit dans
les

les Cloistres; en suite il assista aux Vespres, & à la Predication Italienne: & durant tout ce temps voulut toujours que ie luy fisse compagnie.

Il passa le quatriesme du mesme mois aux RR. PP. de saint Dominique, où on celebroit la Feste de ce grand Saint: là, il fut en communauté dîner avec les Religieux; Il fut entretenu toute l'apresdinée par le R. P. Haillan, Iesuite, iusques aux Vespres, où il assista, & en suite à la Predication.

Le septiesme, qui est le iour de saint Donat, Patron de la grande Eglise de cette Ville, bien que sa fièvre le pressast plus asprement que de coustume, il voulut y aller à la Messe; là, il rencontra Monsieur Bardonache excellent Medecin, qui, outre sa profession, a mille autres belles qualitez qui le rendent recommandable; Il l'entretint fort long-temps, & il prenoit quelque confiance en luy, à cause qu'il auoit reüssi dans vne maladie, que le sieur Ramiers auoit eu, qui luy auoit duré cinq semaines.

Arriua que le douziesme du mois estoit la sainte Claire, & comme il affectionnoit les Religieuses Piedmontoises, il s'y fit porter pour y entendre la grande Messe, qui s'y chantoit en musique: ie le trouuay à la sortie de l'Eglise, où il m'y entretint enuiron vn quart d'heure, puis s'en alla dîner chez Monsieur l'Abbé Vibaut.

Après estre retourné en la Citadelle, son mal commença à redoubler, & la nuit de ce iour il eust moins de repos, & son sommeil fut plus trauersé, & rempli de plus d'inquietudes.

Je fus le quatorzième pour auoir l'honneur de le visiter ; ie le vis, mais en son liët, entretenu de quelque Officiers de la Garnison, qui taschoient de le diuertir, & de le consoler par les tesmoignages qu'ils luy rendoient, de prendre part en son mal : il leur disoit, *qu'il faisoit dessein de changer d'air; que peut-estre ce changement restablirait sa santé; & que Monsieur de la Simonne, Major de cette Ville, luy auoit fait offre de son logis, qu'il estoit resolu de l'accepter*, ce que tous ces Messieurs trouuerent à propos, & le fortifierent dans sa resolution.

Le 19. il s'y fit transporter, & ie dois rendre ce tesmoignage à la courtoisie dudit Sieur de la Simonne : qu'il y a esté seruy, non pas seulement comme le requeroit le deuoir ordinaire, & la ciuilité que nous deuons aux personnes de sa condition, mais avec tous les soins imaginables : & ie n'aduanceray peut-estre rien contre la verité, si ie dis, que quand il eust esté entre les bras de Madame la Presidente, il n'eust pas esté seruy avec plus de zele, ny avec plus d'empressements. Messieurs, le Gouverneur, & de Meneuille, Lieutenant de Roy, luy ont tesmoigné par leurs assiduez à le visiter, l'estat qu'il faisoient de sa Personne ; & durant tout son mal, leurs visites, & la part qu'ils sembloient prendre à ses disgraces ne diminuoient pas peu la violence des maux qui le pressoient.

Mais tous ces soins n'empescherent pas que le 24. vn hocquet ne le prist, qui nous donna vn fort mauvais pronostic, le Sieur Poncet fut le seul qui mesprisa cette interruption d'haleine : il donnoit mille raisons

pour soutenir son aduis, & nous promettoit que dans peu de iours nous le verrions en parfaite conualescence; & de fait, la suite nous fit esperer qu'il ne se trompoit pas, car le vingt-cinq il se trouua vn peu mieux: & comme l'amour qu'il portoit à ce qu'il auoit laissé de plus cher à Paris le pressoit le plus, il voulut escrire Madame la Presidente, il se donna bien de garde de luy mander rien de sa maladie; il sçauoit que ce seroit le comble de tous ses déplaisirs: car l'amour qu'elle luy portoit, luy rendoit sa disgrâce insupportable, sa maladie la mettroit dans vn desespoir: ce n'est pas qu'il se deffiait de ses forces, mais il la iugeoit par soy mesme; & que comme dans son esloignement rien ne le touchoit, sinon de ne la voir pas; aussi rien ne l'affligeroit si fort que de le sçauoir malade durant cette separation. ne m'estonne plus si on dit, que celuy qui ayme est plus dans le sujet de son amour, qu'en celuy qu'il anime; puis que ce rare esprit dans les plus pressantes attaques de ses maux, n'auoit point d'autres craintes, que pour celle que la vertu, comme le mariage, auoit vny si estroitement avec luy.

Quelques iours apres, comme on vit que contre l'opinion du Sieur Poncet, ce hocquet continuoit tousiours, & deuenoit plus frequent, on soubçonna mal de sa maladie: en ces entrefaites Monsieur de Seuigny le visita, & le trouuant plus abbatu qu'il n'esperoit pas, prist la peine d'appeller d'autres Medecins, que ses ordinaires, pour les consulter sur sa maladie; tous se deffierent de son mal, & on laissa passer le 26. du mois, sans luy parler de quoy que ce fust.

Le vingt-septiesme sur les dix heures du matin, comme i'allois pour le visiter, on me pria de luy faire l'ouuerture du peril ou on le trouuoit, de le persuader de songer à sa conscience, & d'auoir recours au souverain Medecin du Ciel, puis que ceux de la terre estoient impuissans; ie ne trouuay point de resistance à luy disposer: car, pour luy entamer ce discours, ayant pris l'occasion de la Feste du grand saint Augustin, mon Patriarche, qui estoit le lendemain, & le voulant faire resouuenir qu'il m'auoit promis il y auoit long-temps de la sanctifier avec nous, qu'il y auoit Indulgences Plenieres, & qu'il ne doutoit pas du credit de ce saint Pere aupres de Dieu, il ne me permist pas de le presser dauantage, mais m'interrompant, il me dit. *Ie sens bien, mon Maistre, que ie diminueray fort, vous me ferez plaisir de me vouloir entendre demain de confession, mais ie vous prie que ce soit un peu matin, cependant ie feray vne exacte recherche des deffauts de ma vie.*

Le lendemain ie fus à son logis sur les cinq heures du matin, pour effectuer ce dont nous estions conuenu; mais on me fit entendre à l'entrée de sa chambre, que Monsieur Poncet Medecin l'ayant trouué plus mal, auoit preueni mon dessein, & que dès vne heure apres minuit il estoit allé aux RR.PP. Iesuites, d'où il auoit amené le R. P. Haillan, qui l'auoit confessé, que peu de temps apres Monsieur Saluai Grand Vicairre de cette Ville, luy auoit administré ses Sacremens, & sur le rapport qu'on me fit, ie ne regretté iamais rien tant que de n'y auoir pas assisté pour mon edification, car tous ceux qui furent presens m'ont asseuré, qu'ils

n'ont

n'ont iamais rien vû de si zelé, & que toutes nos deuotions ne sont que peintures imparfaites, qui ne rapportent non plus celle qu'il fit paroistre en cette occasion, quel'image du Soleil les brillantes clartez de cét Astre.

Bien que l'affaire qui m'auoit fait sortir de nostre Maison fut faite, ie ne laissé pas de le visiter, pour apprendre au vray l'estat auquel il estoit, i'entray donc dans sa chambre, ie m'approchay de son liét, & comme il m'apperceut il me tendit la main, & me demanda si ie me ressouuenois de prier Dieu pour luy; ie luy respondis, que sans me faire tort, il n'en pouuoit pas douter, & qu'il cognoissoit mieux comme ie luy estois bien intentionné qu'il ne sembloit croire; que depuis sa maladie ie ne songeois guere à autre chose, mais que i'estimois qu'en l'estat où il estoit ses prieres seroient plus puissantes, pour obtenir de Dieu ce qui luy estoit necessaire, puis que i'apprenois qu'il s'estoit disposé contre son mal, ainsi que doit faire vn bon chrestien: qu'il pouuoit dire, comme le Prophete Roy, *Si ambulauero in medio umbræ mortis non timebo mala quoniam tu mecum es*, que ie le priois d'adiouster seulement à ses bonnes dispositions ce souuenir, que celuy qu'il venoit de receuoir estoit vn Dieu d'amour; que comme l'amour de deux cœurs n'en fait qu'vn, ce Dieu homme ne demandoit que de le transformer en luy-mesme; que ie le croyois resolu à cette metamorphose, que d'elle seule dependoit nostre salut: & que si nous n'auions du rapport avec I E S V S crucifié, nous estions sans esperances. *Ie sçay, mon Maistre, me dit-il, ce que*

vous me voulez inspirer, mais par la grâce de Dieu ie n'ay aduersion pour qui que ce soit, & ie suis sans aucun desir de vengeance; ie pardonne de bon cœur à tous mes ennemis; ie prie Dieu de faire grace à tous ceux qui m'ont desseruy: & qui, soit par ialousie, soit par malice, ont mal interpreté mes pensées, & mes discours, ie leur pardonne; non pas à cause que ie ne suis pas en puissance de me vanger, mais purement parce que Dieu me le commande, & que ie suis chrestien, ie sçay que mon Dieu parmy ses maux pria pour ses persecuteurs, qu'il se mettoit entre la Iustice de son Pere & ses Bourreaux, & que pendant qu'il le faisoient mourir, il leur procuroit vne nouvelle vie: ouy, mon Pere, me dit-il, ie luy demande pardon, & pour eux & pour moy, ie le prie de cœur de me faire la mesme grace que ie voudrois leur faire s'ils m'auoient offencé.

C'est icy la sonde du veritable chrestien; le pardon des injures est la marque des predestinez, & il faut qu'apres de si sensibles desplaisirs qu'estoient ceux qu'on luy auoit suscitez, que son amour sur-abondast pour auoir ces sentimens; il faut estre bien despoüillé du vieil homme pour former ces resolutions; la grace que nous faisons en cette rencontre, passe chez la plupart pour vne perte, & la vengeance leur tient lieu d'un grand reuenu; souuent nous disons de bouche, ce que nostre cœur des-aprouue, & comme l'Aigle, l'un de nos yeux regarde le Ciel, tandis que l'autre est fixement attaché à la terre.

On ne peut pas soubçonner de feintise les paroles qui sont sorties de sa bouche, en vn temps où l'on ne pouuoit pas douter de la sincerité de ces pensées: ce

sont presque les dernières paroles qu'il prononça de sa vie, après une confession parfaite, & qu'il ne faisoit presque que de recevoir le précieux corps de I. Christ.

A quelques heures de là on luy apportait l'Extreme-Onction, qu'il receut avec des sentimens tres-particuliers de pieté, remerciant tous ceux qui auoient pris la peine d'assister à ce Ministère, & demandant pardon, mesmes aux moindres de ceux qui le seruoient, les conjurant de ne se point souuenir si durant son mal il luy estoit eschapé contre eux quelques paroles impatientes; que la rigueur du mal les auoit outragez, & non pas son cœur, & qu'il les auoit tousiours considéré comme ses freres: neantmoins tous ceux qui l'ont, ou visité, ou seruy durant sa maladie, ont remarqué, que bien qu'il fust d'un temperament sanguin, & prompt, il n'y eut iamais rien de si patient; ce n'estoient qu'excuses, & que prieres, & souuent ses domestiques rougissoient honteux de ses abbaissemens.

Monsieur de Seuigny, & le Reuerend Pere Haillan, Iesuite, voyant qu'il affoiblissoit insensiblement, le sollicitèrent de vouloir declarer l'estat de ses affaires, & ses dernières volontez; mais sans s'esmouuoir, il leur respondit, *que l'estat present ou il estoit ne luy permettoit pas de faire aucune disposition, que neantmoins sous le bon plaisir du Roy, & si sa Majesté l'auoit agreable, il auroit souhaitté que Madame sa femme eust l'entiere disposition de ses biens apres sa mort; qu'il auoit six enfans, quatre garçons, & deux filles, qu'il desiroit estre esgalez, & qu'il ne faisoit aucun auantage à son fils aîné, sinon qu'il luy laissoit sa Biblioteque.*

Auant cela le sieur Poncet se deffiant de son mal, auoit demandé du secours, & qu'on alla à Thurin chercher d'autres Medecins, avec qui il peut consulter sa maladie; on fit venir le sieur Boursier Medecin de Madame Royale, & vn autre dont ie ne sçay pas le nom, qui arriuerent la veille dont il fit cette derniere disposition de ses biens: le sieur Boursier en l'absence du sieur Poncet, s'estant informé de ceux qui le seruoient de l'estat de sa maladie, luy ayant tasté le poux, examiné les diuers syptomes qui le surprenoient, considéré sa langue qui estoit seiche & noire, remarqué ce hoquet qui ne le quittoit point, les sueurs où il estoit continuellement, le mal de teste qui le persecutoit, & les frequentes agitations & inquietudes qu'il auoit toutes les nuits, iugea que la nature estoit trop foible, & qu'il estoit venu à tard, qu'elle ne pouroit iamais souffrir aucun remede; neantmoins pour ne rien obmettre, qui pût le soulager, ils en tenterent quelques vns, mais inutilement, il perdoit ses forces à veüe d'œil, & bien que sa vie diminuast peu à peu, son courage ne le quittoit point, son visage estoit resolu, ses paroles estoient celles d'un homme fort satisfait, & il prenoit & les remedes & toute la nourriture qu'on luy presentoit.

Enfin, le voyant abandonné des Medecins, nous resoluſmes le R. P. Haillan, & moy, de ne le point abandonner, de demeurer tour à tour aupres de son liët, de l'assister sans intermission, afin de le confirmer dans les bonnes & saintes resolutions qu'il y auoit long-temps, de mourir en veritable Chrestien; souuent

souuent nous l'aduertiſſions qu'il se deuoit consoler
 puisque toutes ses miseres estoient prestes de finir;
 qu'apres ce moment vn bon-heur infiny l'attendoit;
 qu'il possederait vn repos qui ne seroit plus trauerſé;
 qu'il jouïroit de la veüe de l'essence de Dieu; qu'il
 viuroit eternellement avec luy, & que comme dans
 vn torrent il y abyſmeroit toutes ses tristesses: Nous
 luy dismes qu'il confiderast l'estrange mal-heur que
 c'est, d'estre priué à iamais d'un objet si fort aymable;
 qu'elle frayeur on doit auoir en la presence d'un Iu-
 ge si seuer; que son ame y paroistroit bien-toſt pour
 luy rédre compte de toute sa vie, iusques à ses moin-
 dres pensées: mais que comme sa iustice estoit infi-
 nie, sa misericorde l'estoit de mesme; & que comme
 il estoit nostre Pere, il auoit pour nous bien plus d'In-
 dulgence, que de seuerité: qu'en ce destroit où il
 estoit le Chrestien deuoit réiterer souuent des actes
 d'une foy viue, d'une esperance sans deffiance, &
 d'une ardente charité.

Ie m'emancipé vne fois le voyant sans dire mot, &
 sans inquietudes, de luy demander à quoy son esprit
 s'occupoit durant ce profond repos, & quelles pou-
 uoient estre ses pensées: il me respondit tousiours
 ces mesmes paroles. *Respice in faciem Christi tui. Sei-
 gneur, ne regardez pas ce que ie suis, mais ce que vous
 estes; ne considerez pas les deffauts de ma vie, mais les
 souffrances de vostre Fils; voyez son sang, & y noyez
 mes pechez; si i'ay failly, il a fait penitence pour moy:
 mon Maistre & mon Seigneur regardez cét homme
 de douleur.*

Comme il ne faisoit ces reflexions qu'en discours interrompus, & que le hocquet continuel qui le travailloit entre-coupoit toutes ces paroles, la pluspart de ceux qui l'approchoient, & ceux mesmes qui le seruoient tous les iours, oyants seulement quelques mots de son mal distinguez, & ou ils ne remarquoient aucune suite, s'imaginoient tous que la chaleur de la fièvre luy donnoit ces resueries; & parce qu'il parloit d'une chose qu'ils ne cognoissoient pas, ils la prenoient pour des extrauagances: mais c'estoit le sujet de sa meditation, & le dernier entretien de son esprit, qui se réveillant ramassoit toutes ses forces, & taschoit de rompre ces liens pour se joindre à I E S U S-CHRIST crucifié, pour parler aux termes de saint Paul.

En ce destroit, & parmy les dernieres attaques que luy liura la mort, sa plus grande satisfaction étoit d'oüyr souuent repeter aupres de son liét, ces belles paroles du Cantique de la Bien-heureuse Vierge, *Eia ergo aduocata nostra, illos tuos misericordes oculos ad nos conuerte, & Iesum benedictum fructum ventris tui nobis post hoc exilium ostende*, & puis, *Deus in adiutorium meum intende.*

Enfin, apres auoir gardé le hocquet six iours, & auoir demeuré sans parler plus d'un iour, le 30. Aoust vn peu apres minuiet, il ne luy resta de mouuement que pour rendre les derniers souspirs: en ce moment il fit vn effort, comme s'il eut voulu parler, mais inutilement; car il ne pût iamais former aucun son, ny nous, comprendre ce qu'il desiroit, aussi tous, tant

que nous estions dans sa chambre, le voyant dans l'agonie, nous priaimes le R. P. Haillan de reciter avec son compagnon les prieres, & les dernieres recommandations de l'ame, & moy m'approchant plus près de son liët que ie n'estois, ie pouffay à son oreille quelques paroles que ie prononçé fort haut, qu'il témoigna d'entendre; la dessus ie luy donné la dernière & generale absolution, apres quoy il ouurit ses mourantes paupieres, qu'il auoit renuës fermées assez long-temps, & les attachant fixement sur vn crucifix que ie luy presentois, il le baïsa plusieurs fois, & ne destacha du depuis sa veuë de dessus cét objet adorable.

Les recommandations de l'ame estant acheuées, le R. P. Laboucquet, Iesuite, luy fit baisser quelques Médailles d'une singuliere Indulgence, pour ceux qui peuvent prononcer de bouche ou de cœur ce doux Nom de I E S V S.

Bien que la nature fut aux derniers efforts, son esprit neantmoins demeura tousiours égal, les conuulsions ont coustume en ce dernier moment, de tourner les yeux & le visage de la pluspart des hommes, mais ils n'osterent rien des charmes du sien, les illusions dont en ce destroit se sert ordinairement l'ennemy commun de tout ce qui est raisonnable, ne firent aucune impression sur son esprit, il demeura serein : & bien que nous fussions plusieurs personnes proche de luy pour le voir mourir, nous ne pusmes iamais remarquer ce dernier instant de la vie, qu'on appelle mort, tant il passa doucement; ainsi le Soleil

d'un beau iour ne perd point à son couchant le brillant esclat de sa face.

Ce fut de cette sorte que Monsieur le President Barillon ferma les yeux de son corps, pour ouvrir eternellement ceux de son ame : heureux trespas qui luy donne la vie ! vie heureuse qui luy fait faire vne si belle mort. Mon Pere saint Augustin auoit raison de dire, que celuy-là ne pouuoit qu'heureusement mourir, qui auoit tousiours bien vescu, la mort & la vie font vn echo ensemble ; la mort ne respond que ce que la vie à dit : si la vie parle du Ciel, la mort ne dis que Ciel, & ce dernier moment, où ie fus spectateur de la vertu de Monsieur le President, me fit voir, que comme sa vie auoit esté remplie d'un saint zele, sa mort ne pouuoit estre que pretieuse aux yeux de Dieu.

Quelques heures apres qu'il eut expiré, Monsieur de Seuigny desira qu'on ouurit son corps en la presence des Medecins, pour le rapport des causes de sa mort fait, estre enuoyé à Paris, pour la satisfaction de ses proches.

Ses entrailles ont esté inhumées en la grande Eglise de cette ville, où par les soins de Monsieur le Gouverneur on fit vne pompe funebre, qui témoigna l'affection que portoit au deffunct, celuy qui la faisoit faire : outre mondit sieur le Gouverneur assisterent à ces funeraillles Messieurs de Meneuille Lieutenant de Roy en la Place, le President Saurer, le Conseil Souuerain, tous les Officiers de la Garnison, & vne si grande foule de peuple, que les plus larges de

nos ruës se trouuerent trop estroites pour passer ceux qui, pleurans, suiuiuoient ces obseques.

En cette derniere extremité i'aduouë que quelque force que ie me fisse, il ne me fut pas possible de retenir mes larmes, ce grand Homme auoit gagné si puissammēt mes inclinations durant le peu de temps que i'eus l'honneur de le conuerser, qu'il me sembla en ce moment, que sa mort m'arrachoit la moitié de ma vie. Que de larmes ne versay-je point à cette separation ! quel saisissement ne surprist point mon ame ! il faut, Monsieur, que ie vous confesse mes faiblesses, & que i'aduouë, que la pluspart de nos discours ne sont que des rodemontades, qui ne subsistent que durant nostre bon-heur, souuent nous menaçons vn ennemy, qui nous fait mourir de peur.

Ces premieres esmotions passées, la raison me fit croire, enfin, que mes plaintes estoient inutiles, & que leur continuation ne rendroit iamais la vie à celui que ie regrettois, que ie ne deuois attendre de la consolation d'autre que du Ciel, & que dans les abysses de la Prouidence ie trouuerois tout ce que vainemēt ie cherchois ailleurs; ie leuay donc mes mains au Ciel, mon cœur y arriua plustost que mes yeux, & ie rendis graces à ce Dieu d'amour, qui par d'eternels soins auoit conduit la vie de ce grand Homme en vn si heureux port.

Certes, Monsieur, quand ie me détache de la terre, & que ie considere avec quelles misericordes ce dieu tout bon a tiré à soy cēt illustre Chrestien; quels ressorts il a fait joüer pour l'arracher de l'embarras du

monde, afin de le placer dans le Ciel; ie m'escrie, Seigneur, que vous estes admirable en vostre conduite! que vos ouurages sont merueilleux! les honneurs pipent les hommes, comme font les miroirs les petits oyseaux, les flatteurs perdent les plus vertueux quand ils sont esleuez dans des dignitez pareilles à la sienne; & souuent la corruption se glisse parmy ces hommes, qui ne doiuent auoir ny yeux ny mains: Pour le deuelopper de ses pieges, il le contrainst de quitter son païs, de se separer de ce qu'il cherissoit le plus, & d'abandonner sa femme & les enfans, de qui nous quittons rarement les affections sans perdre la vie: mais c'estoit peu de chose pour vn courage comme le sien, sa patience paroît à tous ces coups; l'esperance de les reuoir quelque iour, & de se iustifier, luy faisoit repasser mille fois en son esprit des images, qui le pouuoient satisfaire: pour purifier cét or, il le falloit mettre au feu; c'estoit vn raisin qu'il falloit mettre sur le pressoir, pour en tirer le plus pur suc: la fièvre le prend, cela ne l'estonne pas: les conuulsions le saisissent, il ne change point de resolution; enfin, la mort pour couronner tant de vertus luy arrache la vie, & le fait jouir d'une lumiere qui n'aura plus d'eclipse.

Ne me dites pas, Monsieur, qu'il est à plaindre pour estre mort en vn âge, où la pluspart ne sont presque pas encore hommes: il est des hommes comme des plantes, les vnes ne durent que quelques iours, d'autres verdissent des siecles; les choses les plus parfaites sont celles qui durent le moins; quand vne

fleur a atteint sa perfection elle se fanit bien tost: les plus hautes fortunes sont les plus proches de leur ruïne, & les fruiçts qui meurissent dès le Printemps durent rarement iusques en Hyuer. S'il est mort à 44. ans, Dieu a pourueu à son bon-heur, la lógue vie n'est pas tousiours la plus heureuse: tous les Heros de l'antiquité sont morts en la fleur de leur âge, & les souhaits de la pluspart des Sages de ces vieux siecles estoient pour vne courte vie: aussi, Monsieur, la vie de l'homme est toute pleine de trauerses, rien n'y est assuré, & ie m'assure que si nous estions raisonnables, quand nous la receuons, nous ne la prendrions point sans contrainte.

Certes, cét Ancien disoit bien vray, qu'il sembloit que l'homme fust vne balle dont se jouë la Fortune sur la terre; du Trofne elle l'abbat parmy la poussie-re, & vn mesme Soleil le voit parmy la Pompe, & parmy les chaisnes. Ah, que les hommes sçauent peu ce qu'ils veulent quand ils demandent d'aller iusques à l'extreme vieillesse ! c'est le receptacle de tout les maux, nous ne sommes plus que les restes de ce que nous auons esté, & l'homme ne vit en cét âge, que pour souffrir mille incommoditez : Que sçauons nous, Monsieur, si venans iusques à cette foible & caduque saison de la vie, il eut conserué toute sa vertu : souuent vn vaisseau aura fait heureusement cent voyages iusques aux Indes, qui se vient briser dans le port: les organes qui seruent aux operations de l'ame, s'affoiblissent comme les ressorts d'une Montre: nous retournons dans les foibleesses de l'enfance, &

souuent nos bonnes habitudes se conuertissent en extrauagances.

C'est de là, Monsieur, que ie voudrois que vous consolassiez Madame la Presidente ; elle doit se réjouir que sa vertu est en seureté, & que du milieu des miseres, son ame, qui n'estoit que feu, s'est vnies à son centre, & jouit de l'immortalité: là il voit clairement ce que nous ne voyons qu'en Enigme ; il comprend les ressorts de la Prouidence, qui nous estonnent ; il admire la sagesse de celuy qui prodigue tout pour nous sauuer, & il est consolé de voir que les traueses qu'il a souffertes, luy ont seruy d'eschelons pour monter à la gloire: ceux que Dieu choisit pour siens il les prepare de longue main, il les endurecit pour les polir ; & comme ses fleches dont se seruent encore auiourd'huy les Sauvages, il les met au feu pour les rendre de bon vsage.

Que les meschans ne se vantent pas de leur bonheur, c'est vne marque certaine de leur reprobation: le Ciel qui ne les afflige point ne les iuge pas digne d'une belle entreprise, vn Capitaine choisit tousiours les Soldats de cœur, pour les enuoyer en party, les lasches demeurent au camp pour garder le bagage; Certes, bien qu'ils meurent sur vn liët d'or; que leur chambre ait son platfond chargé de Perles & de Diamans; que ses murailles soient couuertes de tapis de soye ou de brocatelle, qu'ils soient plains de leur Maistres, & de tout vn Estat, ils meurent avec honte, s'ils meurent sans vertu. Ah ! que i'estime l'esclau bien plus heureux qui meurt parmy les fers, qui
perd

perd la vie dans les puanteurs d'un cachot, & qui en sa mort n'a que le Ciel pour tesmoin de ses belles actions, il meurt glorieux, sa mort est sainte & precieuse aux yeux de Dieu; & en ce dernier moment de sa vie, brizant toutes ses chaines, il va iouir d'une eternelle & bien-heureuse liberte.

C'est, Monsieur, sur cette idee que ie vous prie de le considerer, & de le faire voir à Madame la Presidente; c'est de l'examen de cette perte, qu'elle & vous, devez tirer vos avantages, l'amour ne fut jamais jaloux du bien de ce qu'il aime, pourquoy si vous l'aymez, vos plaintes semblent elles enuier sa felicite: louez Dieu de son repos; remerciez-le des graces qu'il luy a faites; & comme vous l'aymiez, ie ne doute pas que vous ne resoluiez l'esprit de Madame la femme, à porter constamment vne perte qui luy est si aduantageuse: bien que i'aye plus de sujet qu'aucun homme du monde, de m'affliger de cette mort, ie me resiouys de ne l'auoir plus; & quoy que ie sçache que veritablement il m'honoroit de son affection, & que ie pouuois beaucoup attendre de luy, s'il eust plus long-temps vescu, ie suis satisfait, & i'espere qu'à son deffaut, Madame la Presidente me continuera ses bontez; & qu'en vostre particulier vous l'asseurerez des sentimens qu'auoit pour ce grand Homme,

Vostre tres-humble & tres-obeïssant seruiteur,
F. Antoine Riuiere, Docteur de Paris, Prieur
& Vicaire General au Conuent de S. Augustin, à Pignerol.



ÆTERNÆ MEMORIÆ

IOAN. IAC.

BARILLON,

CIVIS OPTIMI

SENATORIS AMPLISSIMI

PRÆSIDIS INTEGERRIMI.



VI parta à majoribus natalium claritate illustri: Primum apud Armoricos SENATOR, deinde in supremum Galliarum concessum, cum incredibili totius ordinis gratulatione exceptus; demum à socero Præsidente, in prima disquisitionum PRÆSES adscitus, vniuersis carus, nulli non amabilis, BENEFICVS IN OMNES VIXIT. FAMÆ celebritate & inclytæ virtutis gloria, tam notus inter suos, quam apud externos mirabilis. Seruata in aduersis MORVM ÆQUALITATE, MODESTIAM in secundis coluit, sicut in dubiis singularem animi TRANQUILLITATEM. CVM INGENITA COMITATE quam domi forisque exhibuit, semper tamen inter adulantis fortunæ blanditias fortis, vt aduersus irascentis minas INTREPIDVS, variis patuit tempo-

rum acerbitatibus. Donec sibi potius eligens deesse
quam suis, & patria carere quam fide, regno inter-
dictus, regno major, sub alieno cælo, *piæ morte fæli-*
cem libertatem adeptus est: ÆTERNVM SVI RE-
LINQVENS ET DESIDERIVM ET EXEM-
PLVM. Etat. Anno quadragesimo quarto, Repa-
rata Salutis. M. DC. XLV.

FVnus ex Galliæ Cisalpinæ finibus Lutetiam ac-
citum. Secutæ celebres exequiæ, tùm pompæ
solemnitate, cùm vel maximè procerum frequentia;
vultu, ore, silentio mœrorem preferentium. Morta-
les exuuiæ in auito quod ipse florenti æuo, pia & non
vulgari liberalitate instaurauerat sepulchro deposi-
tæ. Lugente populo, luctuoso senatu, requirente
nobilitate, excessum ciuis omnium oculis gratissi-
mi, iudicis æquissimi, viri per omnia incomparabilis.

Suauissimo Conjugi, Parenti dulcissimo, Fratri
desideratissimo, viro de omnibus optime merito.

P. P.

BONA FAIET; Vxor olim ele-
cta inter clarissimas; tanto fœlix
& digna Conjuge: Filij mœrentes,
Frater, Propinqui; ordines vniuersi.

*Agathius Matthæi Auenion. ex animi & veritatis
sensu promebat.*

*Du vingt-neufiesme Mars mil six cens qua-
rante-neuf, Permission a esté donnée à Sebastien
Martin, d'imprimer les dernieres Actions &
Paroles de Monsieur le President de Barillon,
decedé à Pignerol; Avec deffense à tous autres
de l'imprimer ou faire imprimer, en quelque vo-
lume & caractere que ce soit, ny contrefaire sous
pretexte de changer de titre. Acheué d'imprimer
le 7. Avril 1649.*

*BONA FAIT; Vxor olim ele-
git inter clarissimas; tanto felix
& digna Coniuge: Filij meritis,
Frater, Propius; ceteris vinctis.*

*Agathina Malaris; Ancon. ex animi & vultu
sua promissa.*